



30. januar 2015

UPA 2015/115

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Pinartumik napparsimasoqartillugu ilaquataasut Københavnimi kalaallit peqqisartut najugaqarfianni ineqartinneqartillugit ineqarnermut aningaasartuutit 2016 aallarnerfigalugu pisortanit akilernerqartalernissaat sulissutigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Mimi Karlsen, Inuit Ataqatigiit)

### **Tungavilersuut**

Matumuuna siunnersuutigaara Danmarkimi Peqqissartut Angerlarsimaffianni, pinartumik napparsimasut, najugaqartitaasut ilaqtumik ilaqartariaqartut akiliinatik ineqartinneqarsinnaanissaat.

Maannamut napparsimanngitsut, tikeraat akiliisinneqartarput. Peruluttumik ilalersortariaqartumik, kræfteqartumilluunniit ilalersuineq ilaqutariinnut akisoorujusuanngortarpoq. Nammineq Danmarkiliarneq akileriarlugu aamma ullorpassuusinnaasuni saniatigut ineqarneq, akilersoraanni aningaasarpassuanngortarput, ilaqutariinnut artukkiisinnaasut.

Nunatsinni nappaatit pinartut katsorsarneqarsinnaanngikkaangata Danmarkiliartariaqartarput. Pinartumik nappaateqalernerq inummut nanertuutaalersarpoq, annikilliorarluni, aatsaallu taamak qanigisamik ilaqarnissaq pisariaqartigilertarluni. Eqqarsaatit oqitsuunngitsunut ilaqarnissaq pisariaqartarluni.

Pinartumik nappaammut akiuunniaraanni qanigisat tapersersuisut pisariaqarlunnarput, taakkumi ajorunnaarnissamut qanillisaataasarput.

Napparsimalernermi sulisinnaajunnaarnermi, ilaqutariit aningaasarliulertarput. Taamaammallu saniatigut najuinermi ineqarneq nerisaqarnerlu akiligassanngoraangata ilaqutariit artukkinneqartarlutik.

Peqqissartut illuanni ineeraq napparsimasup inaa tikeraanut atorneqartarpoq, sofa siaartagaq atuinnarlugu. Najuisoq ilaquataasorluunniit namminneq igasinnaavoq, imaluunniit akiliilluni nerisarfimmi nereqataasinnaalluni.

Inissat killeqartarmata, napparsimasullu amerlasinnaallutik napparsimasut tamarmik pineqanngillat, pinartumilli napparsimasut ilaqarsinnaanissaat pineqarluni. Taamaammat malittarisassiornissaq ersarissunik pisariaqassaaq, tamannalu Peqqinnissaqarfimmi sananeqarsinnaavoq.

Taperserneqarnissara neriutigalugu pinartumik napparsimasunut ilaqquttat akeqanngimik peqqissartut illuaniissinnaanerit siunnersuutigaara.

**Pisortanut aningaasaqarnikkut allaffissornikkullu kingunissai.**

Siunnersuut pisortanut aningaasaqarnikkut allaffissornikkullu ukiumut 1.2 mio naleqarsinnaavoq. Aningaasat kontomi 341102-mit atorreqarsinnaapput, tassa tarnikkut nakorsiat Danmarkiliartartut ikilineranni aningaasat allamut atorreqarsinnaammata.

**Namminersorlutik inuussutissarsiortunut aningaasaqarnikkut allaffissornikkullu kingunissai.**

Soqanngilaq

**Innuttaasunut aningaasaqarnikkut allaffissornikkullu kingunissai.**

Innuttaasut pinartumik nappaatilimmik ilaqutaasut aningaasatigut iluaquserneqassapput.